



REPUBLIKA E SHQIPËRISË

AUTORITETI I KOMUNIKIMEVE ELEKTRONIKE DHE POSTARE
KËSHILLI DREJTUES

V E N D I M

Nr. 57, datë 3 . 8 .2018

PËR

**“SHTYRJEN E AFATIT PËR PËRFUNDIMIN E SHQYRTIMIT TË ANKIMIT
ADMINISTRATIV, TË SUBJEKTIT REGJISTRUES “WEBHOST SH.P.K.” KUNDËR
VENDIMIT TË KËSHILLIT DREJTUES NR.41, DATË 04.06.2018”**

Këshilli Drejtues (KD) i Autoritetit të Komunikimeve Elektronike dhe Postare (AKEP), i përbërë nga:

- | | | |
|-----------------|----------|---------|
| 1. Z. Ilir | Zela | Kryetar |
| 2. Z. Alban | Karapici | Anëtar |
| 3. Znj. Edlira | Dvorani | Anëtar |
| 4. Znj. Ketrin | Topçiu | Anëtar |
| 5. Znj. Klarina | Allushi | Anëtar |

dhe sekretare e Këshillit Drejtues Znj. Sara Reçi, në mbledhjen e datës 03.08.2018, sipas procedurës së përcaktuar në ligjin Nr.9918 datë 19.05.2008 “Për Komunikimet Elektronike në Republikën e Shqipërisë”, i ndryshuar, Ligjin Nr. 8480, datë 27.05.1999 “Për funksionimin e organeve kolegjiale të administratës shtetërore dhe enteve publike”, dhe Rregullores së Brendshme të Funksionimit të Këshillit Drejtues të AKEP, miratuar me Vendimin Nr.7 datë 16.02.2018 të Këshillit Drejtues të AKEP, pranoi për shqyrtim ankimin administrativ me objekt:

“Kundërshtimin e pjesshëm të vendimit të Këshillit Drejtues nr.41, datë 04.06.2018”, të subjektit Regjistruar të domaineve nën .al “WebHost sh.p.k”,

BAZA LIGJORE:

1. Pika 1, e nenit 114, dhe pika 1, e nenit 115, të Ligjit Nr.9918, datë 19.5.2008 “Për Komunikimet Elektronike në Republikën e Shqipërisë”, i ndryshuar (*ligji 9918/2008*);
2. Neni 92, neni 140, të Ligjit nr. 44/2015, “Kodi i Procedurave Administrative i Republikës së Shqipërisë” (*ligji44/2015*);
3. Rregullore Nr.2 datë 21.02.2008 për “Regjistrimin dhe Administrimin e Emrave të Domain-eve nën .AL dhe nën domain-et .gov.al, .mil.al, .edu.al, .com.al, .org.al dhe .net.al”, e ndryshuar;

K Ë SHILLI DREJTUES

Nga shqyrtimi i materialit shkresor, të përbërë nga:

1. Ankim Administrativ i datës 16.07.2018 (nr.1967 Prot, datë 16.07.2018, i AKEP) i Regjistruetit të domaineve nën .al “Webhost sh.p.k.”;
2. Projekt Vendimin për shtyrjen e afatit për përfundimin e shqyrtimit të ankimeve administrative, të subjektit regjistruet “Webhost sh.p.k.”, kundër vendimit të Këshillit Drejtues nr.41, datë 04.06.2018”
3. Relacionin shoqërues të projektvendimit;

si dhe nga diskutimet në mbledhje mbi çështjen, dhe duke iu referuar bazës ligjore të sipërcituar,

V Ë R E N:

I. NË ASPEKTIN PROCEDURAL:

1. AKEP, në bazë të pretendimit për ankimin administrativ të Regjistruetit të domaineve nën.al “Webhost sh.p.k.”, ndaj Vendimit të KD-së Nr.41, datë 04.06.2018, “*Për miratimin e disa shtesave dhe ndryshimeve në Rregulloren nr.2, datë 21.02.2008 “Për regjistrimin dhe administrimin e emrave të domaineve nën .al dhe nëndomainet .gov.al, mil.al, .edu.al, .com.al, .org.al dhe .net.al”*” e ndryshuar, konstaton se, ankimi administrativ është paraqitur brenda afateve ligjore dhe plotëson kushtet e pranimit sipas nenit 132 dhe 135 të Ligjit nr.44/2015, “Kodi i Procedurave Administrative i Republikës së Shqipërisë”.

II. NË ASPEKTIN E TRAJTIMIT TË ÇËSHTJEVE:

2. Regjistrueti “Webhost sh.p.k.”, me shkresën nr. 001 Prot, datë 16.07.2018, (nr.1967, datë 16.07.2018 i AKEP), ka paraqitur pranë AKEP ankimin administrativ kundër Vendimit nr.41, datë 04.06.2018 të Këshillit Drejtues të AKEP, “*Për disa shtesa dhe ndryshime në Rregulloren nr.2, datë 21.02.2008, “Për regjistrimin e domaineve nën.al, dhe nëndomainet .gov.al, mil.al, edu.al, com.al, org.al dhe .net.al”*”;
3. Regjistrueti “Webhost sh.p.k.” ka parashtruar pretendimet në lidhje me sa vijon:
 - i. Me anë të Vendimit nr.41, datë 04.06.2018, AKEP, ka vendosur kufizimin e lirisë së veprimtarisë ekonomike si pasojë e përcaktimit të kufizimit të numrit të domaineve deri në 5 për individ, dhe 15 domaine për subjekte juridike. Vendosja e këtij kufizimi në numrin e domaineve, sipas regjistruetit në fjalë cënon parimin e lirisë ekonomike dhe vjen në kundërshtim me politikat e liberalizimit të tregut. Sipas tij, kufizimi i të drejtave të parashikuara në nivel Kushtetues mund të bëhen vetëm me ligj, në mënyrë proporcionale dhe jo me akte nënligjore si Rregullore. Për rrjedhojë, AKEP me këtë vendim, ka marrë atributet e një organi ligjvënës, duke kufizuar të drejtat e subjekteve në kundërshtim me nenin 17 të Kushtetutës së RSH-së.
 - ii. Me Vendimin nr. 41, datë 04.06.2018, të Këshillit Drejtues, AKEP, i ka dhënë vetes cilësinë e “Regjistruetit”, përcaktim ky i cili shkel parimet e konkurrencës

dhe tejkalon kompetencat ligjore të AKEP. Sipas subjektit "Webhost sh.p.k", shqetësimi i AKEP, si autoriteti rregullator i cili ka të drejtë të ruajë, të ndërhyjë dhe të disiplinohet tregun si dhe të mbrojë konsumatorin, në raport me vendimin e marrë, nuk është proporcional me rrethanat objektive, duke mos sjellë një relacion me kufizimet teknike për një subjekt se sa domeine duhet të ketë në posedim duke vendosur numrin maksimal 15, vendos vetveten në kushte konkurrence jo të drejtë pasi duke patur ai vetë atributet e regjistruarit si regjistruarit e licensuar prej saj, dhe duke e përjashtuar vetveten nga i njëjti rregull, e vendos atë në pozita më të favorshme krahasuar me regjistruarit e tjerë.

- iii. Pika 3 "Të drejtat dhe detyrimet e Regjistruarit" e Aneksit 1, të Rregullores Nr. 2, datë 21.02.2018, gërma g) *"revokimi i menjëhershëm i licencës në rast përsëritje"*, përbën një paragraf jo të përcaktuar saktë. Sipas subjektit "Webhost sh.p.k", një formulim i tillë lë shteg për keqinterpretime të cilat duhen sqaruar dhe konkretizuar.
- iv. Subjekti "Webhost sh.p.k", gjithashtu, pretendon se Vendimi i KD nr. 41, datë 04.06.2018 është në kundërshtim me parashikimet e ligjit procedural për organet e administratës publike, konkretisht nenin 4, "Parimi i Ligjshmërisë" të Ligjit 44/2015, "Kodi i Procedurave Administrative", dhe se AKEP nuk ka respektuar parashikimet e nenit 17, "Parimi i barazisë dhe mosdiskriminimit" të Ligjit 44/2015, "Kodi i Procedurave Administrative", pasi me pranimin e disa propozimeve dhe refuzimin e shumicës së propozimeve të sjella nga grupet e interesit, ka shkelur parimin e barazisë në kushtet kur subjektet e zbatimit të rregullores që miratohet nga AKEP, janë në kushte të njëjta dhe i nështrohen të njëjtës paketë ligjore dhe praktikave përkatëse, e nuk ka rrugë dhe shteg për trajtim dhe pranim të diferencuar përveç parashikimit nga neni 17 i Kodit të Procedurave Administrative.

Si përfundim,

- Subjekti "Webhost sh.p.k" kërkon nga AKEP, përmirësimin e mëtejshëm të kuadrit rregullator, si dhe ka dalë me propozimin se, formulimi më i drejtë në kushtet aktuale në një fazë testuese dhe jo ligjshmërie të plotë, për nenin 7.1 të Rregullores nr. 2, datë 21.02.2008, do të ishte me përmbajtjen se: *"Numri i lejuar i domeineve .al përfshirë nëndomainet në posedim, është deri në 10 domaine për individët dhe deri 30 domaine për subjektet fizike dhe juridike private/tregtare (përfshirë Regjistruarit e domeineve .al), me kushtin që të vendosen në përdorim brenda një afati 1 (një) vjeçar...."*,

III. QËNDRIMI I AKEP.

Këshilli Drejtues i Autoritetit të Komunikimeve Elektronike dhe Postare, për shkak të kompleksitetit faktik të çështjes, dhe me qëllim shqyrtimin e plotë dhe gjithpërfshirës të pretendimeve dhe parashtrimeve të subjektit "WebHost sh.p.k", në lidhje me ankimin administrativ, kundër vendimit të Këshillit Drejtues nr. 41, datë 04.06.2018 *"Për miratimin e*

disa shtesave dhe ndryshimeve në Rregulloren nr.2, datë 21.02.2008 "Për regjistrimin dhe administrimin e emrave të domaineve nën .al dhe nëndomainet .gov.al, mil.al, .edu.al, .com.al, .org.al dhe .net.al" e ndryshuar, gjykon të nevojshme, shtyrjen e afatit për përfundimin e procedurës administrative.

PER KETO ARSYE:

Bazuar në nenin 92, nenin 140, të ligjit nr. 44/2015 "Kodi i Procedurave Administrative i Republikës së Shqipërisë", në nenin 114 të Ligjit nr.9918, datë 19.05.2008 "Për Komunikimet Elektronike në Republikën e Shqipërisë" dhe nenet 128 e në vijim të Ligjit nr. 44/2015, "Kodi i Procedurave Administrative i Republikës së Shqipërisë", Këshilli Drejtues i AKEP,

V E N D O S :

1. Shtyrjen e afatit për përfundimin e procedurës administrative për ankimin administrativ të subjektit "WebHost sh.p.k", kundër Vendimit të Këshillit Drejtues nr.41, datë 04.06.2018 "Për miratimin e disa shtesave dhe ndryshimeve në Rregulloren nr.2, datë 21.02.2008 "Për regjistrimin dhe administrimin e emrave të domaineve nën .al dhe nëndomainet .gov.al, mil.al, .edu.al, .com.al, .org.al dhe .net.al" e ndryshuar, deri në datën 13 shtator 2018.
2. Të njoftohet subjekt "WebHost sh.p.k" për këtë Vendim;

Ky Vendim hyn në fuqi në datën e miratimit të tij.

KRYETAR

Ilir Zela

ANËTARË:

1. Alban KARAPICI
2. Edlira DVORANI
3. Ketrin TOPÇIU
4. Klarina ALLUSHI